

სტუდენტების სოციალ-დემოგრაფიული მახასიათებლების სტატისტიკური ანალიზი

მინდორაშვილი მარინე

ეკონომიკის აკადემიური დოქტორი,
ასოცირებული პროფესორი

აბესაძე ნინო

ეკონომიკის აკადემიური დოქტორი,
ასოცირებული პროფესორი

გიორგობიანი მაია

ეკონომიკის აკადემიური დოქტორი, ასისტენტ პროფესორი
ივანე ჯავახიშვილის სახელობის თბილისის
სახელმწიფო უნივერსიტეტი

დემოგრაფიულ მოვლენებსა და პროცესებზე პირდაპირი ზემოქმედება შეზღუდულია. ამიტომ, რთულია საზოგადოების განვითარების თანამედროვე ეტაპისათვის მისაღები საზოგადოების რეპროდუქციული განწყობის ჩამოყალიბება და მისი შესაბამისი დემოგრაფიული ქცევის განსაზღვრა. საკითხი უფრო სენსიტიური ხდება, როდესაც საქმე სტუდენტი ახალგაზრდობის დემოგრაფიულ განწყობას ეხება არსებული არცთუ სახარბიელო დემოგრაფიული ვითარების ფონზე. ამ შემთხვევაში, რა თქმა უნდა, გასათვალისწინებელია არამარტო ახალგაზრდობის შეხედულებების მრავალგვარობა მოსალოდნელ დემოგრაფიულ ქცევაზე, არამედ მათი დემოგრაფიული განწყობის განმსაზღვრელი ოჯახური, ეროვნული, ეკონომიკური და სოციალური ფაქტორების, რელიგიური ტრადიციების მრავალფეროვნება და სხვა ცხოვრებისეულ ფასეულობათა ორიენტაცია. სტუდენტების დემოგრაფიული განწყობის სტატისტიკური შეფასება შესაძლებელია მხოლოდ შესაბამისი ინფორმაციული უზრუნველყოფის პირობებში. სწორედ ამ ინფორმაციული ბაზის ფორმირებას ემსახურება ჩვენ მიერ გამოკვლეული სტუდენტების სოციალ-დემოგრაფიული მახასიათებლები.


საკვანძო სიტყვები: სტუდენტი, დემოგრაფიული ქცევა, დემოგრაფიული განწყობა, სოციალ-დემოგრაფიული მახასიათებლები.

მიზნობრივი კვლევითი პროექტის - „საქართველოს სტუდენტი ახალგაზრდობის დემოგრაფიული განწყობა“, ფარგლებში განხორციელდა სტუდენტების სოციალ-დემოგრაფიული მახასიათებლების შესახებ ინფორმაციის მოპოვება ანკეტური მეთოდით და მისი სტატისტიკური ანალიზი. კითხვარის დიზაინმა საშუალება მოგვცა ამომწურავი ინფორმაცია მიგველო როგორც რესპონდენტთა დემოგრაფიული მახასიათებლების, (როგორცაა- სქესი, ასაკი, დაბადების ადგილი, უმაღლესი სასწავლებელი, სწავლის საფეხური, ქორწინებითი სტატუსი, ეროვნება), ასევე სოციალური სტატუსების შესახებ (შემოსავლის დონე, შეხედულებები და მოლოდინები საზოგადოებისთვის საჭირობო სხვადასხვა საკითხთან დაკავშირებით).

კვლევაში მონაწილე 2452 რესპონდენტიდან, რომელთა შერჩევა მოხდა შემთხვევითი შერჩევით, გუგლის ელექტრონული აპლიკაციით მონაწილეობდა 1732 ქალი (ვალიდური პროცენტი 70.9) და 710 კაცი (ვალიდური პროცენტი 29.1). კვლევაში მონაწილე რესპონდენტების სქესობრივი თანაფარდობა არ არის პროპორციული და სავარაუდოდ, პასუხები უმეტესწილად ქალების პოზიციით არის განპირობებული, რადგან მათი რაოდენობა თითქმის 2.5-ჯერ აჭარბებს მამაკაცებისას. ზოგადად, ელექტრონული ანკეტური გამოკითხვების სიმარტივეს, რომელიც საგრძნობლად ამსუბუქებს რესპონდენტის ტვირთს, თან ახლავს სქესთა შორის არაპროპორციული გადანაწილება, რაც ჩვენ შემთხვევაში, მამაკაცთა აბსოლუტურ და შეფარდებით სიმცირეში გამოიხატა, თუმცა ეს არ მეტყველებს შერჩევის არარეპრეზენტაულობაზე.

ასაკობრივი ნიშნით რესპონდენტების დაჯგუფება მოხდა ოთხ ჯგუფად, მათ შორის: 19 წლამდე, 20 – 24; 25 - 29 და 30 წლისა და ზევით. როგორც მოსალოდნელი იყო, ყველაზე მრავალრიცხოვანი აღმოჩნდა 20 – 24 წლიანთა ასაკობრივი ჯგუფი, ხოლო უმცირესობაში აღმოჩნდა 30 წელზე მაღალი ასაკის რესპონდენტები. რესპონდენტი ქალების საშუალო ასაკია 21,3 წელი, ხოლო მამაკაცების - 20,9.

ნახაზი 1. რესპონდენტების განაწილება ასაკის მიხედვით⁴, %



სქესის მიხედვით ასაკობრივმა გადანაწილებამ გვიჩვენა, რომ მდედრობითი სქესის რესპონდენტების განაწილება ასაკობრივი ჯგუფების მიხედვით (0.26; 0.64; 0.08; 0.02) მკვეთრად განსხვავდება მამაკაცებისგან, სადაც ასაკობრივ ჯგუფებში გადანაწილება შედარებით თანაბარზომიერია (0.32; 0.59; 0.27; 0.1). ორივე სქესის შემთხვევაში მაღალია რესპონდენტთა თავმოყრა 20 – 24 წლიანთა ჯგუფში, თუმცა საერთო ჯამში, 19 – 24 წლიანთა გამსხვილებულ ინტერვალში თავმოყრილია როგორც ქალების, ისე მამაკაცების 90%.

დაბადების ადგილის მიხედვით რესპონდენტების დაჯგუფებამ დაგვანახა, რომ მათი უმეტესობა ქალაქად არის დაბადებული, თუმცა სოფლად დაბადებულთაგან შეიძლება ბევრი მათგანი ქალაქად აგრძელებს ცხოვრებას. ამასთან, ქალაქად დაბადებული გოგონები 3-ჯერ აღემატებიან სოფლად დაბადებულების რიცხოვნობას, ხოლო ვაჟები - 2.5-ჯერ.

ასაკისა და დაბადების ადგილის კროსტაბულაციამ აჩვენა, რომ ქალაქად დაბადებულთა ხვედრითი წილები შედარებით მაღალია 25 და მეტი ასაკის რესპონდენტთა შორის, ვიდრე დაბალ ასაკებში.

კვლევაში ძირითადად მონაწილეობდნენ ბაკალავრიატის საფეხურის სტუდენტები (რესპონდენტების 81,7%), ხოლო 18.3%-ს მაგისტრატურისა და დოქტორანტურის სტუდენტები შეადგენდნენ. აღსანიშნავია, რომ ბაკალავრიატის სტუდენტთა შორის 70% ქალია, მაგისტრატურის საფეხურზე - 69, ხოლო დოქტორანტურაში მათი წილი 80%-ია. როგორც მოსალოდნელი იყო, უმაღლესი სასწავლებლების მიხედვით რესპონდენტები არათანაბრად გადანაწილდნენ, დიდი აქტივობა გამოიჩინეს თსუ-სა და ქუთაისის აკაკი წერეთლის სახელობის უნივერსიტეტის სტუდენტებმა, ყველაზე ნაკლები კი - თელავისა და ბათუმის უნივერსიტეტების სტუდენტებმა. კვლევაში მონაწილეობა მიიღეს კერძო უნივერსიტეტების სტუდენტებმაც (კატეგორიაში „სხვა“).

სტუდენტების სტატუსი ქორწინებაში შესწავლილ იქნა სამი კატეგორიით - დაუქორწინებელი, დაქორწინებული და განქორწინებული. დაუქორწინებელი სტუდენტები რესპონდენტთა უმრავლესობას შეადგენენ. დაქორწინებულ სტუდენტთა შორის უმეტესობა ქალია (94%).


თუ დაბადების ადგილის მიხედვით დავაჯგუფებთ რესპონდენტებს, ვნახავთ, რომ დაუქორწინებელთა და დაქორწინებულთა უმეტესობა ქალაქად არის დაბადებული, ხოლო განქორწინებულები თანაბრად არიან განაწილებული დაბადების ადგილების მიხედვით.

უმაღლესი განათლების საფეხურის მიხედვით განაწილებულ რესპონდენტთა შორის, დაუქორწინებელთა ხვედრითი წილი მაღალია ბაკალავრთა შორის (94.7%), დაქორწინებულთა კი - დოქტორანტთა შორის (41.7%). განქორწინებულთა ხვედრითი წილი უმნიშვნელოა, თუმცა მაინც გვხვდება მხოლოდ ბაკალავრთა შორის (0.5%).

გამოკითხულ სტუდენტთა შორის უმრავლესობა იყო ქართველი (93.2%), დანარჩენი ეროვნებები წარმოდგენილი იყო კლებადი თანმიმდევრობით: სომეხი, აზერბაიჯანელი, რუსი და იეზიდის. როგორც ქართველ, ისე სომეხ და აზერბაიჯანელ რესპონდენტთა შორის ქალები 2-ჯერ და მეტ-ჯერ სჭარბობენ მამაკაცებს.

⁴ ყველა ნახაზი აგებულია ჩვენ მიერ ჩატარებული კვლევის შედეგების მიხედვით.

ნახაზი 2. სქესის მიხედვით დაჯგუფებული რესპონდენტების განაწილება შემოსავლების დონის მიხედვით, %



გამოკითხულ სტუდენტთა 2/3 მიიჩნევს, რომ მისი ოჯახი საშუალოშემოსავლიანია, 22.6 პროცენტი დაბალშემოსავლიანად აღიქვამს თავს, ხოლო 2.3 პროცენტი აფიქსირებს მაღალ შემოსავლებს. აღსანიშნავია, რომ ქალებთან შედარებით, გამოკითხულ მამაკაცთა მეტი რაოდენობა აკუთვნებს თავს დაბალშემოსავლიან (+3.9%) და მაღალშემოსავლიან (0.8%) კატეგორიებს, ხოლო ქალების უფრო მეტი რაოდენობა მიიჩნევს თავს საშუალო შემოსავლის მქონედ (+4.6%).

ასაკის მიხედვით, 20 – 24 წლიან ასაკობრივ ინტერვალში ყველაზე მეტი რესპონდენტი აიდენტიფიცირებს თავს საშუალო, დაბალ და მაღალშემოსავლიან ჯგუფებთან, მას მოსდევს 25 - 29 წლამდე ასაკობრივი ჯგუფი. დაბადების ადგილის მიხედვით ყველაზე დიდი დისპროპორცია შეიმჩნევა მაღალშემოსავლიანთა ჯგუფში (ქალაქად დაბადებულთა ხვედრითი წილი ამ ჯგუფში 4.5-ჯერ აჭარბებს სოფლად დაბადებულთა წილს). უმაღლესი სასწავლებლის საფეხურის მიხედვით, დოქტორანტურისა 91.7% და ბაკალავრიატის 75.8% საფეხურებზე ძალიან მაღალია საშუალოშემოსავლიანთა წილი, ხოლო მაგისტრატურაში შედარებით მაღალია დაბალშემოსავლიანთა წილი 27.1%.

ქორწინებითი სტატუსის მიხედვით დაჯგუფებულ რესპონდენტთა შორის შემოსავლის ყველა კატეგორიაში სჭარბობს დაუქორწინებელი სტუდენტობა, რომელთა 75% საშუალოშემოსავლიანია, 23% დაბალშემოსავლიანი, ხოლო 2% მაღალშემოსავლიანი.


დაბალშემოსავლიანთა შორის 94.5% დაუქორწინებელია, საშუალოშემოსავლიანთა შორის 92.6%, ხოლო მაღალშემოსავლიანებში 54.5%. დაქორწინებულთა ყველაზე მაღალი სიხშირე მაღალშემოსავლიანებშია (36.4%), ასევე განქორწინების შემთხვევაში - ეს კატეგორია სჭარბობს კვლავ მაღალშემოსავლიან ჯგუფში (9.1%).

უნდა აღინიშნოს, რომ გამოკითხული სტუდენტების დიდი უმრავლესობა რელიგიურად მიიჩნევს თავს, ყოველი მეხუთე თვლის თავს არარელიგიურ პიროვნებად. ამასთან, სტუდენტ ქალებს შორის 15%-ით მეტი მორწმუნეა მამაკაცებთან შედარებით. ასაკის მიხედვით, მორწმუნეთა ყველაზე მაღალი წილი - 81.3% დაფიქსირდა 20-24 წლიანთა ინტერვალში, ხოლო ყველაზე ნაკლებად რელიგიური აღმოჩნდა 25-29 წლიანთა ჯგუფი - 31.6%. დაბადების ადგილის მიხედვით, სოფლად დაბადებულები უფრო მაღალი რელიგიურობით გამოირჩევიან (84.6%), ხოლო არარელიგიურობით - ქალაქად დაბადებულები (23.3%). სწავლის საფეხურის მიხედვით რელიგიურობის შესწავლამ დაგვანახა, რომ ის იკლებს სწავლების საფეხურის მატებასთან ერთად და დოქტორანტურის საფეხურზე არარელიგიურ რესპონდენტთა წილი 41.7%-მდე იზრდება. ქორწინებითი სტატუსის მიხედვით დაჯგუფებულ რესპონდენტთა შორის რელიგიურობა საინტერესო ვარიაციით ხასიათდება. კერძოდ, სტატუსი „რელიგიური“ მიუთითა განქორწინებულთა 100%-მა, დაქორწინებულთა 86.1% და დაუქორწინებულთა 78.0%-მა.

საინტერესო იყო ახალგაზრდების მოსაზრება გენდერული თანასწორობის შესახებ. კერძოდ, კითხვაზე, ემხრობით თუ არა ქალისა და მამაკაცის გენდერულ თანასწორობას, 62.7 %-მა გასცა დადებითი პასუხი, ნაწილობრივ 35.4 %-მა, ხოლო სტუდენტების უმნიშვნელო ნაწილმა, 1.8 %-მა, დააფიქსირა ამ საკითხისადმი უარყოფითი დამოკიდებულება. ჯამში, შეიძლება ითქვას, რომ გენდერული თანასწორობის იდეა სტუდენტთა აბსოლუტური უმრავლესობისთვის მისაღებია (98.2 %). ამასთანავე, გენდერულ თანასწორობასთან დაკავშირებით, მნიშვნელოვანი ვარიაციები დაფიქსირდა სქესთა შორის. განსაკუთრებით დიდი განსხვავებაა ქალებსა და მამაკაცებს შორის გენდერული თანასწორობის სრულიად გაზიარებასთან დაკავშირებით. ქალების 2/3 და მამაკაცების 1/3-ზე ნაკლები სრულიად ემხრობა გენდერული თანასწორობის იდეას, ხოლო ნაწილობრივ - 63

და 37 პროცენტი. გენდერული თანასწორობის მონინალმდეგები პროცენტულად უფრო უახლოვდებიან ერთმანეთს, შესაბამისად, ქალების 55.6 % და მამაკაცების 44.4 %:

ნახაზი 3. გენდერული თანასწორობის მიხედვით დაჯგუფებული რესპონდენტების განაწილება სქესის მიხედვით, %




გენდერული თანასწორობის საკითხის შესწავლამ ასაკების მიხედვით მნიშვნელოვანი სხვაობა გამოავლინა სტუდენტების შეხედულებებში. სახელდობრ, სამივე კატეგორიის მიხედვით ყველაზე მაღალი აქტივობა 20-24 წლიანთა ჯგუფში გამოიკვეთა. როგორც მომხრეების, ისე ნაწილობრივ მომხრეებისა და მოწინააღმდეგეების უმრავლესობა ამ ჯგუფში იყრის თავს (62.1; 63.6; 66.7). უფრო მეტიც, ამ ასაკობრივ ჯგუფში მოწინააღმდეგეების ხვედრითი წილი წინა ორ კატეგორიას 2.9 პროცენტული პუნქტით აჭარბებს. ნაკლები დისპროპორციაა ყველა ასაკობრივ ჯგუფში სამივე პასუხის განაწილებებს შორის, თუმცა აღსანიშნავია, რომ 19 წლამდე სტუდენტებში გაცილებით ნაკლებია მოწინააღმდეგეთა წილი (22.2% VS 28.3 და 27.4), ხოლო მეტია 20-24 (66.7%) და 25-29 წლიან(11.1%) ჯგუფებში, 30 და ზევით ჯგუფში გენდერულ თანასწორობას მოწინააღმდეგე არ გამოუჩნდა.

თუ სამივე კატეგორიის მიხედვით რესპონდენტთა კონცენტრაცია 20-24 წლიანთა ჯგუფში გამოიკვეთა, ასაკების მიხედვით კატეგორიებში განაწილებამ დაგვანახა, რომ გენდერული თანასწორობის იდეას ცალსახად მხარს უჭერს მხოლოდ 30 წლის და ზევით ასაკობრივი ჯგუფი, დანარჩენ ასაკობრივ ჯგუფებში ეს მაჩვენებელი 60 %-ის ფარგლებშია, ხოლო ნაწილობრივი მხარდაჭერა 34-36 პროცენტს არ სცდება. მოწინააღმდეგეთა ბანაკში 2 %-ზე მეტს მხოლოდ 25-29 წლიანთა ჯგუფის წარმომადგენლები შეადგენენ. როგორც ჩანს, გენდერული თანასწორობის იდეას უფრო მეტი მხარდაჭერა აქვს დაბალშემოსავლიან და საშუალოშემოსავლიან რესპონდენტებში. ამ შემთხვევაში, ნაწილობრივ მომხრეები თითქმის მათ ნახევარს შეადგენენ, რასაც ვერ ვიტყვით მაღალშემოსავლიან კატეგორიაზე, რადგან მიუხედავად იმისა, რომ მათი ნახევარზე მეტი გენდერული თანასწორობის მომხრეა, საკმაო მხარდაჭერას უცხადებენ „ნაწილობრივ“ კატეგორიას (36.4%) და შემოსავლის დანარჩენ კატეგორიებთან შედარებით, გარკვეულ ჯგუფსაც კი ქმნიან „მოწინააღმდეგეთა“ სახით (9.1%).

მიუხედავად იმისა, რომ დაბალშემოსავლიან და მაღალშემოსავლიან ჯგუფებში საშუალოშემოსავლიანთან შედარებით მაღალია გენდერული თანასწორობის მოწინააღმდეგეთა ხვედრითი წილი, საბოლოო ჯამში, გენდერული თანასწორობის იდეის ფორმირებაში ყველაზე მნიშვნელოვან წილი საშუალოშემოსავლიან ჯგუფს შეაქვს.

ნახაზი 4. შემოსავლების მიხედვით დაჯგუფებული რესპონდენტების განაწილება გენდერული თანასწორობის მომხრეთა/მოწინააღმდეგეთა ჯგუფებში, %



გენდერულ თანასწორობასთან დაკავშირებით რესპონდენტთა შეხედულებები სამივე კატეგორიაში განაწილებულია ქართველებსა და სომხებში, რასაც ვერ ვაკვირდებით რუს და იეზიდ რესპონდენტთა შორის და ნაწილობრივ აზერბაიჯანელებში. ამასთან, ნიშანდობლივია, რომ აზერბაიჯანელთა შორის მაღალია ნაწილობრივი მხარდაჭერის წილი, რუსები მხოლოდ ამ კატეგორიას უჭერენ მხარს, ხოლო იეზიდები აბსოლუტურად სრულ მხარდაჭერას აფიქსირებენ. რელიგიურ რესპონდენტთა შორის 59.3 პროცენტი ემხრობა სრულიად გენდერულ თანასწორობას, ხოლო არარელიგიურებს შორის - 75 პროცენტი. რელიგიურ სტუდენტებს შორის არარელიგიურებთან შედარებით მაღალია ნაწილობრივ მომხრეების წილი. როგორც დაქორწინებულებში, ისე განქორწინებულებში მორწმუნეთა წილი უფრო მაღალია, თუმცა არარელიგიურ პირებში დაუქორწინებლები სჭარბობენ.

რაც შეეხება რესპონდენტების დამოკიდებულებას „ლგბტქ“ თემის მიმართ, შეიძლება ითქვას, რომ გამოკითხულთა მხოლოდ მეოთხედია ტოლერანტული, 17 პროცენტამდე არატოლერანტული, ხოლო ნეიტრალურ შეხედულებას იზიარებს ნახევარზე მეტი, დაახლოებით 58 პროცენტი. ეს კითხვა ერთგვარი ლაკმუსის როლს ასრულებს იმის დასადასტურებლად, რომ სტუდენტი ახალგაზრდობა, ისევე როგორც საზოგადოების სხვა წარმომადგენლები, სტერეოტიპების გავლენას განიცდიან. სწორედ ამან განაპირობა ის ფაქტი, რომ ახალგაზრდობის უმრავლესობის დამოკიდებულება ამ მარგინალური ჯგუფის მიმართ ნეიტრალური ან მკვეთრად უარყოფითია.

ყველაზე არატოლერანტულიები ლგბტქ თემის მიმართ აღმოჩნდნენ რუსები, ქართველთა და სომეხთა შორის მათი წილი შესაბამისად 16 და 25.9 %-ია, ხოლო აზერბაიჯანელი და იეზიდი რესპონდენტები აბსოლუტურ ნეიტრალიტეტს აფიქსირებენ. ქართველებში ტოლერანტობის წილი უფრო მაღალია სომხებთან შედარებით, ხოლო ნეიტრალურობის მიხედვით მათი წილები თითქმის ერთნაირია (57.4 და 55.6). ტოლერანტულ, არატოლერანტულ და ნეიტრალურ რესპონდენტებს შორის უმეტესობა საშუალოშემოსავლიანია, ნეიტრალურ ჯგუფში შედარებით მაღალი წილით (24.8) არის წარმოდგენილი დაბალშემოსავლიანი ჯგუფი.

როგორც კვლევიდან გამოვლინდა, რელიგიურ სტუდენტთა შორის ტოლერანტულების წილი ნეიტრალურებთან შედარებით 3-ჯერ დაბალია, ხოლო არარელიგიურებს შორის განსხვავება ნეიტრალურებსა და ტოლერანტულებს შორის მხოლოდ 3.9 %-ია; რელიგიურ რესპონდენტთა შორის არატოლერანტულების წილი 2.5-ჯერ მეტია. ტოლერანტულ სტუდენტთა შორის არარელიგიურები 2-ჯერ სჭარბობენ მორწმუნეებს, არატოლერანტურებში 90 %-ზე მეტი მორწმუნეები არიან, ხოლო ნეიტრალურთა შორის დისპროპორცია ძალიან მაღალი არ არის, თუმცა მორწმუნეები 1.2-ჯერ მეტნი არიან. ტოლერანტობისა და გენდერული თანასწორობის კროსტაბულაციიდან ირკვევა, რომ ლგბტქ თემის მიმართ ტოლერანტულებს შორის 83.3 პროცენტი სრულიად ემხრობა გენდერულ თანასწორობას, არატოლერანტულებს შორის 35.8, ხოლო ნეიტრალურებს შორის 61.1 %. ლგბტქ თემის მიმართ არატოლერანტულებს შორის 56.8 პროცენტი ნაწილობრივ, ხოლო 35.8 % სრულიად ემხრობა გენდერულ თანასწორობას. გენდერულ თანასწორობას არ ემხრობა ტოლერანტულთა 0.8, არატოლერანტულთა 7.4 და ნეიტრალურთა 0.7 %.

საინტერესო იყო სტუდენტთა შეხედულების შესწავლა მარიხუანას მოხმარების დეკრიმინალიზაციაზე. გამოკითხულთა ნახევარზე მეტი დარწმუნებულია, რომ მარიხუანას მოხმარების დეკრიმინალიზაცია შეამცირებს შვილიანობას. საემაოდ დიდ ნაწილს, 36 %-მდე, არ გააჩნია მყარი პოზიცია ამ საკითხისადმი და მხოლოდ 13 %-ს მიაჩნია, რომ სახელმწიფოს მიერ გატარებული პოლიტიკა მარიხუანის მოხმარებასთან დაკავშირებით პირდაპირ არ გამოიწვევს შვილიანობის შემცირებას.

ლგბტქ თემის მიმართ ტოლერანტულ რესპონდენტთა შორის 65.6% თვლის, რომ დეკრიმინალიზაცია გავლენას არ მოახდენს შვილიანობაზე, ხოლო არატოლერანტული სტუდენტების 72.8 %-ის აზრით - შეამცირებს. ლგბტქ თემის მიმართ ნეიტრალური სტუდენტებიდან 53.6 %-ის აზრით შეამცირებს, ხოლო თითქმის 40 %-ს უჭირს კითხვაზე პასუხის გაცემა.

აგრეთვე, მნიშვნელოვანია ახალგაზრდების მოსაზრებები საქართველოსთვის უმთავრეს გამოწვევებთან მიმართებაში. შედეგების ანალიზმა ცხადყო, რომ რესპონდენტთა დიდმა ნაწილმა - 57%-მა, უმთავრეს პრობლემად მიიჩნია უმუშევრობა და სიღარიბე, ტერიტორიული მთლიანობა - 49%-მა, ეკოლოგია - 32%-მა, დემოგრაფიული პრობლემები დაასახელა რესპონდენტთა 22.7%-მა, კრიმინოგენური სიტუაცია - 22%-მა, ხოლო სხვა - 25.4%-მა.

დასკვნა

სტუდენტი ახალგაზრდობის დემოგრაფიული ქცევის შესწავლაში აქტიურობით გამოირჩეოდნენ ქალები, რომელთა საშუალო ასაკია 21.3 წელი, ხოლო მამაკაცებისა - 20.9 წელი, ამასთან, ორივე სქესის მიხედვით, რესპონდენტებს შორის ყველაზე მრავალრიცხოვანი აღმოჩნდა 20 – 24 წლიანთა ასაკობრივი ჯგუფი. ბაკალავრიატის სტუდენტთა შორის 70% ქალი აღმოჩნდა, მაგისტრატურის საფეხურზე - 69, ხოლო დოქტორანტურაში - 80%. უმაღლესი განათლების საფეხურის მიხედ-

ვით განაწილებულ რესპონდენტთა შორის დაუქორწინებელთა ხვედრითი წილი მაღალია ბაკალავრებში, დაქორწინებულთა კი - დოქტორანტთა შორის. განქორწინებულთა ხვედრითი წილი უმნიშვნელოა. გამოკითხულ სტუდენტთა 2/3 მიიჩნევს, რომ მისი ოჯახი საშუალოშემოსავლიანია, 22.6 % დაბალშემოსავლიანად მიიჩნევს თავს, ხოლო 2.3 % აფიქსირებს მაღალ შემოსავლებს. ამასთან, დოქტორანტურისა და ბაკალავრიატის საფეხურებზე ძალიან მაღალია საშუალოშემოსავლიანთა წილი, ხოლო მაგისტრატურაში შედარებით მაღალია დაბალშემოსავლიანთა წილი. ქორწინებითი სტატუსის მიხედვით დაჯგუფებულ რესპონდენტთა შორის შემოსავლის ყველა კატეგორიაში სჭარბობს დაუქორწინებელი სტუდენტობა, რომელთა 75% საშუალოშემოსავლიანია. 23% დაბალშემოსავლიანი, ხოლო 2% მაღალშემოსავლიანი. გამოკითხული სტუდენტების დიდი უმრავლესობა რელიგიურად მიიჩნევს თავს, ყოველი მეხუთე თავს თვლის არარელიგიურ პიროვნებად. სტუდენტ ქალებს შორის 15%-ით მეტი მორწმუნეა მამაკაცებთან შედარებით. ასაკის მიხედვით, მორწმუნეთა ყველაზე მაღალი წილი - 81.3% დაფიქსირდა 20-24 წლიანთა ინტერვალში, ხოლო ყველაზე ნაკლებად რელიგიური აღმოჩნდა 25-29 წლიანთა ჯგუფი - 31.6%. დაბადების ადგილის მიხედვით, სოფლად დაბადებულები უფრო მაღალი რელიგიურობით გამოირჩევიან. სტუდენტთა გადამწყვეტი უმრავლესობა ემხრობა გენდერული თანასწორობის იდეას. ქალების 2/3 და მამაკაცების 1/3-ზე ნაკლები სრულიად ემხრობა გენდერული თანასწორობის იდეას. გენდერული თანასწორობის იდეას უფრო მეტი მხარდაჭერა აქვს დაბალშემოსავლიან და საშუალოშემოსავლიან რესპონდენტებში. ლგბტქ თემის მიმართ გამოკითხულთა მხოლოდ მეოთხედია ტოლერანტული, 17 %-მდე არატოლერანტული, ხოლო ნეიტრალურ შეხედულებას იზიარებს ნახევარზე მეტი, დაახლოებით 58%. რესპონდენტთა ნახევარზე მეტი დარწმუნებულია, რომ მარიხუანას დეკრიმინალიზაცია შეამცირებს შვილიანობას, ამ საკითხისადმი მყარი პოზიცია არ გააჩნია 36 %-ს და მხოლოდ 13 %-ს მიაჩნია, რომ სახელმწიფოს მიერ გატარებული პოლიტიკა მარიხუანას მოხმარებასთან დაკავშირებით, პირდაპირ არ გამოიწვევს შვილიანობის შემცირებას. რესპონდენტთა დიდმა ნაწილმა საქართველოსთვის უმთავრეს პრობლემად მიიჩნია (კლებადი თანმიმდევრობით) უმუშევრობა და სიღარიბე, ტერიტორიული მთლიანობა, ეკოლოგია, დემოგრაფია, სხვა პრობლემები და ბოლოს, კრიმინოგენური სიტუაცია.

STATISTICAL ANALYSIS OF STUDENTS SOCIO-DEMOGRAPHIC CHARACTERISTICS

Mindorashvili Marine

Academic Doctor in Economics, Associated professor

Abesadze Nino

Academic Doctor in Economics, Associated professor

Giorgobiani Maia

*Academic Doctor in Economics, Assistant-Professor
Ivane Javakhishvili Tbilisi State University*

Summary

Direct impacts on demographic events and processes are limited. Therefore, it is difficult to establish the acceptable reproductive attitude of society, for the current stage and to determine its corresponding demographic behavior. The problem becomes more acute when it comes to demographic behavior of young people when background is not very favorable. In this case, of course, one should take into account not only the diversity of young people's ideas about the expected demographic behavior, but also the variety of family, national, economic and social factors, religious traditions and other life values that determine their demographic mood. The socio-demographic characteristics of the students we surveyed, serve to form the database for statistical assessment of the demographic mood of students in Georgia.

Key words: Student, demographic behavior, demographic mood, socio-demographic characteristics.

შენიშვნა: სტატია ეფუძნება თსუ-ის ეკონომიკისა და ბიზნესის სამეცნიერო მიზნობრივი გრანტის ფარგლებში ავტორების მიერ ჩატარებული კვლევის შედეგებს.